

籌辦夷務始末

同治朝
卷六十七之六十八

347.911
50000

THE
CHINESE

一

二

三

四

五

六

七

八

九

THE
CHINESE

籌辦夷務始末卷之六十七

同治八年己巳七月壬申福州將軍文煜閩浙總督英桂
福建巡撫卞寶第奏竊照閩省之福州廈門及臺灣之打
狗滬尾分設四口准與各國通商。中外交涉事件較各省
之僅設一二口者繁簡不同。雖廈門與臺灣之打狗滬尾
向歸該管道員暨派辦通商委員分任其事。仍須由省總
理其成。且各國領事官住紮福州。文牘往來。幾無虛日。其
有事關緊要。非文牘所能宣達者。必須隨時派員與領事
官往返面議。或按約辯論。或據理相折。然非明練勤能為
領事官素所信服之員。每致片言不合。鑿枘即形。現在福

州口洋務日繁。乏員委派。臣等再四籌商。亟應添調幹員來閩辦理。以期妥洽。查有叅革福建補用道前任福州府知府丁嘉璋。順天府大興縣人。經前督臣吳棠以善伺意旨。積壓案牘。奏叅革職。嗣丁本生母降服憂。回籍守制。現計服闋。臣英桂在福州將軍及兼署閩浙總督任內。因公時相接見。深知其才識練達。辦事勤能。臣文煜。臣卞寶第密訪輿論。亦咸稱其精明強幹。熟悉洋情。檢查該員福州府任內摺報發審案件。未結者僅四十餘起。均因人證未齊。無憑訊結。尚非有意積壓。且該員歷任省會各缺。辦理通商事務。諸臻妥洽。各國領事官迄今均尚信服。又查有

福建儘先補用參將王榮和。經江蘇撫臣丁日昌調赴江蘇。委令辦理通商事宜。該員通曉洋語。於各國洋情。極為熟悉。除王榮和一員先由臣英桂檄調外。合無仰懇天恩。俯念閩省洋務日繁。需員遣用。

准予飭調丁嘉璋來閩。並

飭下江蘇撫臣丁日昌。飭令王榮和迅速赴閩。俾得派員辦理通商事務。於大局較有裨益。

諭軍機大臣等。文煜等奏洋務日繁。請調員來閩差遣。閩省福州口洋務日繁。必須添員辦理。方臻妥協。前福州府知府丁嘉璋。福建儘先補用參將王榮和。既據該將軍等奏稱。該員等熟悉

洋情自應俯如所請。丁嘉璋籍隸順天府大興縣。著萬青黎。王榕吉。飭令該員迅速赴閩。王榮和一員。前經丁日昌調赴江蘇。業由英桂檄調。仍著丁日昌卽飭該參將。尅日前往。以資差遣。英桂。卞寶第。又奏。竊照合眾國羅妹商船。在臺灣瑯瑤地方。遭風。被生番戕殺一案。委員查辦完結情形。經臣英桂會同前撫臣李福泰。恭摺具奏。聲明鳳山縣境。由枋寮至瑯瑤一帶。應作何設官駐兵。容督飭省會司道。及臺灣鎮道通盤籌畫。另行辦理。奉

旨。該衙門知道。欽此。恭錄轉行。欽遵。先據前臺灣鎮總兵劉明燈。議請將瑯瑤地方。撫而有之。設官徵賦。前署臺灣鎮總兵

曾元福議循土牛之禁。仍歸荒服。前臺灣道吳大廷則兩
存而節取之。議於枋寮地方。設官駐兵。瑯瑤柴城地方。調
取屯外委酌帶屯丁駐紮。並就該處閩粵各社頭人中舉
充總理。專司防範生番。保護遭風洋船各事宜。徵賦從緩。
續據該鎮道等疊次會議具詳。大旨約略相符。經臣等委
令本任平潭同知鄭元杰等馳往周歷履勘。茲據勘明繪
圖呈送。並以博採眾論。瑯瑤之柴城及風港地方。民番錯
處。均未便設官駐兵。議仿照臺灣各廳縣沿山隘口。設立
隘募章程。選舉隘首隘丁。分段防護。伏查鳳山縣治原設
興隆里。嗣移埤頭。由埤頭以南三十里為東港。又三十里

至枋寮。係赴瑯嶠陸路要道。由枋寮過溪。即屬番界。十二里至荊桐腳。自荊桐南行十八里至風港。沿途山深菁密。僅闢一綫。以通行。人。兼有兇番潛伏伺殺。自風港三十里至瑯嶠之柴城。均係熟番村社。並有閩粵民人雜處其中。瑯嶠背山面海。山以內為生番十八社。又由瑯嶠以南三十里至大鑄房。有兩路可通。外路沿海。內路緣山。龜鼻山。即在大鑄房。與龜仔角對峙。其番社在凹之內。亂山重疊。不能深入。又查枋寮以至瑯嶠。另有海道可通。惟涌浪甚大。礁石林立。時有山風壓船。名曰落山風。舟行過之。立為齑粉。夏秋風暴不常。尤不可渡。蓋水陸皆天險也。故向設

土牛之禁。今瑯嶠一帶。閩粵民人居處日繁。而打狗口通商以來。復屢有洋人私躡其地。生番伺殺無常。設再有如羅妹商船之事。辦理殊費周章。自應妥籌防範。庶邊境藉資控制。中外亦可相安。臣等督同司道熟籌詳度。鳳山縣治以南六十里之枋寮。切近番界。為防番扼要之地。擬請將鳳山縣屬之興隆里巡檢。改駐枋寮。在於新設臺灣道標內撥千總一員。兵五十名。並在臺灣南路營撥兵五十名。合成一百名。同往該處駐紮。經理護洋防番各事。瑯嶠地方。近海多閩人。依山多粵人。山內為番人。擬請就閩粵番三籍之內。每籍選舉正副各二人。名曰隘首。壯丁各五

十名。名曰隘丁。各就三籍所居之地。分設隘寨。逐段防護。如遇洋船遭風。隨時救援。轉送地方官按約妥辦。其風港地方。另選正副隘首二名。隘丁五十名。一律設寨分防。均歸枋寮巡檢千總就近督率。仍由臺防理番同知管理。並責成鳳山縣一體稽察。再合眾國領事官李讓禮請在龜鼻山建設礮臺。應俟臺灣鎮道府勘定。再行酌辦。

御批該部議奏

丁亥。署伊犁將軍烏里雅蘇台參贊大臣榮全奏。奴才竊會同俄官。分抵烏里雅蘇台所屬邊境。先立牌博兩處。行抵珠魯淖爾地方。該俄官以途路難行為詞。奴才告以我奉

君命前來立界。總以遵照原圖紅線為準。道雖險阻。不敢畏難。卽貴官奉你們君命前來。亦應公平立界。以敦兩國和好。畏難繞道。不照紅線立界。似不合理。該俄官詞窮理屈。始照原議。按紅線行走。於初五日在珠魯淖爾東南約十數里哈爾噶小山上。同立第三座牌博。又順珠魯淖爾北岸唐努山南約二十里察布雅齊壩上。同立第四座牌博。照原圖所繪紅線以外。珠魯淖爾圈出為俄國地。哈爾噶小山以東。察布雅齊壩以北。俱係中原地。按照原圖紅線相合。卽日據唐努烏梁海蒙古等官稟稱。由此順唐努山南向行走。止有兩三站路可通。再向前行。險山大水。實不能

越向內繞道無多。雖係唐努烏梁海邊境。幸係曠野荒山。此等隙地。儘可稍讓。與遊牧並無妨礙等語。察其情詞。極為恭順。係屬實情。惟思稍繞道路。總期絲毫無越。蒙心當更悅服。趕於初六日。會同俄官順珠魯淖爾北岸。唐努山南直向西行。至珠魯淖爾末處。轉折而北而東。均係紅綫以外。科屬阿勒坦淖爾烏梁海地方。現已分給俄國道路。山險水大。亂石隙中。泥淖屢陷馬腹。每下馬扶掖而進。約共行二百五十餘里。至庫色爾壩上。此地已接唐努烏梁海向西偏北極邊地方。於此壩上。同立第五座牌博。由此向西。無路可通。祇得下壩。向東北入唐努烏梁海邊境。

約行一站半路。趕卽轉折而西而北。約共行三百餘里。至
十三日。行抵唐努鄂拉達巴哈末處。迤西山下。有水一道。
係向西流。名楚拉察河。亦係紅綫以外。應分給俄國之地。
隨於十五日。會同俄官。向東北約四五里。於小山坡楚拉
察水流之處。同立第六座牌博。其東南係唐努烏梁海邊
境。其西北為俄國地。查照原圖紅綫。幸無絲毫侵越。從此
向北轉折向東。順哈喇淖爾蘇爾壩青格赤樓。直至沙賓
達巴哈。俱係險山。一脈相連。路雖險阻。探聞勉強可通。當
與俄官議論擇日啟行。是役也。道路本極艱險。祇得減裝
隨帶馬馱帳房。裹糧而進。隨地紮營。因恐俄官裹足。間以

酒食款待。住宿之時。又每借與房間。設法駕馭。籠絡其心。幸得拽彼行抵此地。奴才查看情形。再向前行。無大曲折。諒該俄官無可藉口侵越。界務應望完竣。惟該夷居心叵測。奴才隨時隨地。仍當留心防範。卽界務立畢。繪畫地圖。尤須時加小心。必期紅綫無稍偏曲。以期仰慰

聖鑒。

御批知道了。嗣後仍當隨處留心防範。毋任俄人狡詐。是為至要。乙未總理各國事務恭親王等奏。前因奧斯馬加國使臣畢慈在天津三口通商大臣衙門呈遞照會。由崇厚奏明。復經臣衙門議准照換約各國成案。一律覈辦。於六月十

二日具奏奉

旨派

臣

董恂會同崇厚辦理當經欽遵行知崇厚並恭錄函知阿

禮國遵照轉行該使臣畢慈旋偕英國副使雅妥瑪等來

署與臣董恂相見呈出所擬條款

臣

董恂查閱該使臣所

擬條約四十九款均從各國內採摘芟節湊集而成其中

有為各國條約所有必不可刪而該使臣刪去者有為各

國條約所無必不可添而該使臣添設者有款內意義相

同可以併為一款者當經督飭派辦司員逐一覈對將該

使臣原送條約內有礙體制暨流弊過甚之四款刪去並

將各原款所應存者刪改數語將原款所未備者設立三

條。仍參用各國條約。改定四十七款。於二十三日。函送英副使雅妥瑪。轉交該使。臣畢慈會閱辦理。旋據該使臣來函。欲將臣衙門所添商人不准充領事官一語。不列入條約。將臣衙門所刪傳教一條。仍列入約內。臣董恂伏思洋人入華傳教。流弊滋多。近來各省教案。層見疊出。多一傳教之國。卽多一滋事之案。不得不杜漸防微。慎之於始。是以雖為各國條約中所有。亦必決然刪去。以冀一髮千鈞之挽。至商人充當領事官。包庇洋商。漏交稅餉。其弊不可勝言。邇來布國商人在各口充當領事者。不一而足。疊經照會禁止有案。與其防維於事後。不若杜絕於事前。故於

此次立約。仿照日約第四款。將商人不准充領事一語。明列條約。以免各海口貿易弊端。以上兩條。臣董恂因大局所繫。屢與該使臣面折力爭。未肯鬆勁。相持二十餘日。迄無成議。直至七月十二日。始接據該使臣畢慈來函。願將傳教一條。遵照刪除。商人不准充領事官一節。另備照會。於畫押之日。一同呈遞。以為日後憑據。因思既有照會。即與列入條約無異。且於各國俱列之傳教一款。該國獨能遵奉刪去。自應略予轉圜。准其照辦。十四日。雅妥瑪來署。覈對條款。復有歸併之條。因其無甚出入。准予改併。所有原議四十七款。改為四十五款。未便再與計較。用示懷柔。